

四庫全書

子部

欽定四庫全書

冊府元龜卷二百五十六 宋 王欽若等 撰

儲官部

總序

昔三王家天下以傳於子司馬遷作本紀載夏商之世
系詳矣而如氏多父子繼立商人率兄弟相及儲嫡之
制無聞焉禮有文王世子之篇春秋傳載王世子會于
首止而諸侯之嫡子亦稱世子蓋成周之制天王之子

稱王世子諸侯之子稱世子又皆有太子之稱秦併六國兼皇帝而建號漢承秦法崇建儲貳以嫡嗣為皇太子諸侯王之嫡子稱世子焉歷世以還遵其位號蓋大易述主器之義實長於震宮書紀元良之重以正于萬國前星少海之象著乎穹厚撫軍監國之任備乎出處繼明承序予以顯守祧之貴廟趨郊見予以彰率禮之教授經齒學所以敦道義之則安車金璽所以異車服之等至於宮朝之設則承華博望越藩邸之範官屬之次

則保傳三少峻天秩之品其後加四率之衛益坊寺之職命爵之叙侔於上臺奉養之給亞於尊極良以其承萬代之業居羣后之上帝宸之貳體率土之繫心當副君之任為天下之本故其禮秩之尤重而安危之斯屬焉今之所紀者自文武而降包舉鼎國并叙南北以迄于前唐凡膺明兩之重司七噲之祀類其行事辨其淑慝若夫少陽毓德終正南面而有發誕彌之祥慶挺淵穆之儀表因心形于孝友作事彰乎令德智量越于羣

品辭學昭乎世譽係乎一人之善者比不復徵其於建
樹明嫡之始尊異師傅之禮出統兵旅居掌國政賓待
賢雋諷諫違失及夫胄延之尚齒宮臣之講學公朝之
崇獎優制之旌飾咸用論次以著于編凡儲宮部一十
七門

建立

王者建立儲貳所以重宗廟社稷而安天下也自內禪
已還或弟或子尊尊親親各以其道故周文三朝之事

著于禮經漢明四重之德形于詩什書曰一人元良萬
邦以貞易曰明兩作離大人以繼明照于四方此之謂
也若乃東海辭讓劉氏隆於永平晉王矯飾楊宗覆于
大業以愛則臨淄京兆幾遺魏嗣之賢以功則貞觀開
元卒致唐祚之盛繇斯而言主七鬯承大統者非徒人
事蓋亦有天意焉然自周以前不載建儲之事故以漢
氏為首

漢高祖初為漢王二年六月壬午立子盈為太子

即惠帝也

文帝元年正月有司請蚤建太子所以尊宗廟也詔曰

朕既不德上帝神明未歆饗也天下人民未有慝志

慝快

也今縱不能博求天下賢聖有德之人而嬪天下焉而

曰豫建太子是重吾不德也

重謂增益也

謂天下何

猶言何以稱天

下之

其安之

安猶徐也言不宜汲汲耳

有司曰豫建太子所以重宗

廟社稷不忘天下也帝曰楚王季父也春秋高閱天下

之義理多矣

閱猶更歷也

明於國家之體吳王於朕兄也淮

南王弟也皆秉德以陪朕

陪輔也

豈為不豫哉諸侯王宗

室昆弟有功臣多賢及有德義者若舉有德以陪朕之

不能終是社稷之靈天下之福也今不選舉焉而曰必

子必將傳位於子人其以朕為忘賢有德者而專於子非所以

憂天下也朕甚不取有司固請曰古者殷周有國治安

皆且千歲治安言治理而且安寧也有天下者莫長焉言上古以來國祚長久無

及殷周者也用此道也所以能爾者以承嗣相傳故也立嗣必子所從來遠

矣高帝始平天下建諸侯為帝者太祖諸侯王列侯始

受國者亦皆為其國祖子孫繼嗣世世不絕天下之大

義也故高帝設之以撫四海

設置立也

今釋宜建

釋捨也宜建謂適嗣

而更選於諸侯宗室非高帝之志也更議不宜

不當更議

啓最長敦厚慈仁請建以為太子帝乃許之因賜天下

民當為父後者爵一級

景帝四年四月己巳立皇子榮為皇太子

七年正月廢太子榮為臨江王二月丁丑立膠東王徹

為皇太子

即武帝也

武帝元狩元年四月丁卯立皇子據為太子

即戾太子也

後元二年二月乙丑立皇子弗陵為皇太子

昭帝也後
單名弗

太子年八歲以侍中奉車都尉霍光為大司馬大將軍

受遺詔輔少主初衛太子

即太子據也
其母衛氏

為江充所敗

而燕王旦廣陵王胥皆多過失是時帝年老寵姬鉤弋

趙婕妤有男

婕妤居鉤弋
宮故稱之

帝心欲以為嗣命大臣輔之

察羣臣唯光任大重可屬社稷

任堪也
屬委也

帝乃使黃門畫

周公輔成王朝諸侯以賜光

黃門之署職任親近以供
天子百物在馬故亦有畫

工及帝病篤光涕泣問曰如有不諱誰當嗣者帝曰君

未諭前盡意邪立少子君行周公之事

宣帝地節三年四月戊申立皇太子驚

即成帝也

成帝綏和元年二月癸丑詔曰朕承太祖鴻業奉宗廟

二十五年德不能綏理宇內百姓怨望者衆不蒙天祐

至今未有繼嗣天下無所係心觀于往古近事之戒禍

亂之萌皆繇斯焉

始生曰萌

定陶王欣於朕為子慈仁孝順

可以承天序繼祭祀其立欣為皇太子

即哀帝也

初王祖母

傅太后隨王來朝私賂遺帝所幸趙昭儀及帝舅驃騎

將軍曲陽侯王根昭儀及根見帝亡子亦欲豫自結為
長久計皆更稱定陶王勸帝以為嗣帝於是召丞相翟
方進御史大夫孔光右將軍廉褒後將軍朱博皆引入
禁中議中山定陶王誰宜為嗣者方進根以為定陶王
帝弟之子禮曰弟之子猶子也為其後者為之子也定
陶王宜為嗣褒博皆如方進根議光獨以為禮立嗣以
親中山王先帝之子帝親弟也以尚書盤庚殷之及王
為比

師古曰兄終弟及也比必寐反

中山王宜為嗣帝以禮兄弟不相

入廟又皇后昭儀欲立定陶王故遂立為太子為加元服而遣之時年十七矣明年使執金吾任宏守大鴻臚持節徵定陶王立為皇太子王謝曰臣幸得繼父守藩為諸侯王材質不足以假克太子之宮

謙不敢言為太子故云假克若

言非

正 陛下聖德寬仁敬承祖宗奉順神祇宜蒙福祐子

孫千億之報

詩曰千祿百福子孫千億言成王宜民宜天之所保佑永得福祿故子孫衆多也

臣願且得留國邸旦夕奉問起居俟有聖嗣歸國守藩書奏天子報聞後月餘立楚孝王孫景為定陶王奉恭

王祀所以獎厲太子專為後之誼

後漢光武建武二年六月戊戌立子疆為皇太子

十九年六月戊申詔曰春秋之義立子以貴東海王陽

皇后之子宜承大統皇太子疆崇執謙退願備藩國父

子之情重久違之其以疆為東海王立陽為皇太子改

名莊

即明帝也時樂人作歌詩四章曰重光月重輪星重暉海重潤以贊太子之德

明帝永平三年二月甲子立皇子烜為皇太子

即章帝也

章帝建初四年四月戊子立皇子慶為皇太子

七年六月甲寅廢皇太子慶為清河王立皇子肇為皇

太子

即和帝也

詔曰皇子肇保育皇后承順懷任孳達善性

將成其器蓋庶子慈母尚有終身之恩豈若嫡后事正

義明哉今以肇為皇太子

和帝元興元年十二月辛未立皇子隆為皇太子是夜

即皇帝位時誕育百餘日

即瑒帝也

安帝永寧元年四月丙寅立皇子保為皇太子

即順帝也

順帝建康元年四月辛巳立皇子炳為皇太子

魏武帝既受漢封為魏王建安二十二年十月漢獻帝

以五官中郎將曹丕為魏太子

即文帝也

初臨淄侯植既以

才見異而丁議丁廙楊修等為之羽翼帝狐疑幾為太子者數矣而植任性而往不自彫勵飲食不節文帝御之以術宮人左右並為之說故定為嗣

文帝黃初七年五月丙辰立平原王叡為皇太子

即明帝也

丁巳即皇帝位初太子為平原王時文帝以郭后無子詔使子養帝平原以母不道終意甚不平後不獲已乃

敬事郭后旦夕因長遇問起居郭后亦自以無子遂加
慈愛文帝始以平原不悅有意欲以他姬子京兆王禮
為嗣故久不拜太子平原常從文帝射殺鹿母使平原
射鹿子平原不從曰陛下已射其母臣不忍復射其子
因涕泣文帝即放弓箭以此深奇之而樹立之意定至
是文帝病篤乃立為皇太子

明帝景初三年正月丁亥立齊王芳為皇太子

即廢帝也是

日即皇帝位

蜀先主初為漢中王立子禪為王太子及即尊號冊為
皇太子

後主延熙元年正月以子璿為皇太子

吳太帝初受魏封為吳王立子登為王太子黃龍元年
帝即皇帝位以吳王太子登為皇太子

赤烏四年五月太子登卒五年正月立子和為太子

十三年八月廢太子和處故鄣十一月立子亮為太子
亮字子明大帝少子也帝春秋高而亮最少故尤留意

姊全公主嘗諧太子和子母心不自安因倚帝意欲豫自結數稱述全尚女勸為亮納妃和廢帝遂立亮為太子

景帝休永安五年八月戊子立子寧為太子

後主皓建衡元年正月立子瑾為太子

晉文帝既受魏封為晉王咸熙元年十月魏陳留王以中撫軍新昌鄉侯司馬炎為晉世子二年五月命世子

為太子

即武帝也

初文帝以景帝既宣帝之嫡早世無後以

次子攸為嗣特加愛異自謂攝居相位百年之後大業
宜歸攸每曰此景王之天下也吾何與焉將議立世子
屬意於攸問孫秀曰大將軍開建未遂吾但承奉後事
耳故立攸將功歸於兄何如秀以為不可又以問山濤
濤對曰廢長立少為禮不祥國之安危當必繇之何曾
固爭曰中撫軍聰明神武有超世之材髮委地手過膝
此非人臣之相也太子位于是乃定

羊琇涉學有智少與武帝同學甚相

親狎每接延同席帝未立為太子而聲譽不及弟攸文帝素意重攸常有代宗之議琇密為武帝書策甚有條

理又密觀文帝為政損益揆度應所顧問之事皆令武帝默而識之其後文帝與武帝論當世之務及人間可否武帝答無不允繇是儲位遂定

武帝泰始三年立皇子衷為皇太子

即惠帝也

詔曰朕以不

德托于四海之上兢兢祇畏懼無以康濟寓內思與天下式明王度正本清源於置嗣樹嫡非所先務又近世每建太子寬宥施惠之事間不獲已順從王公卿士之議耳方今世運垂平將陳之以德義示之以好惡使百姓蠲多幸之慮篤始終之行曲惠小仁故無取焉咸使知

聞

七年正月丙午皇太子冠

惠帝永熙元年八月壬午立廣陵王遹為皇太子

即愍懷太子

也子

永平元年正月丙午皇太子冠遹字熙祖惠帝長子母

曰謝才人幼而聰慧武帝愛之常在左右嘗與諸皇子

戲於殿上惠帝來朝執諸皇子手次至太子帝曰是汝

兒也惠帝乃止

元康九年十二月廢為庶人

永康元年四月立皇孫臨淮王臧為太孫詔曰咎徵數發奸回作變適既逼廢非命而歿今立臧為皇太孫還妃王氏以母之稱太孫太妃

永寧元年正月趙王倫篡帝位廢太孫臧為濮陽王五月立襄陽王尚為皇太孫

太安元年正月皇太子尚薨六月以清河王遐子覃為皇太子持齊王冏表曰東宮曠然冢嗣莫繼天下大業帝王神器必建儲副以固洪基今者後宮未有孕育不

可庶幸將來而虛天緒非祖宗之遺志社稷之長計也
禮兄弟之子為猶子故漢成無嗣繼繇定陶孝和之絕安
以紹興此先王之令典往代之成式也清河王覃神姿
岐嶷慧智早成康王正妃周氏所生先帝衆孫之中於
今為嫡昔薄姬賢明丈則承位覃外祖恢世載明德覃
宜奉宗廟之重統無窮之祚以寧四海顒顒之望覃兄
弟雖並出紹可簡令淑還為國裔不替其嗣輒諮大將
軍成都王穎及羣公卿士咸同大願請具禮儀擇日迎

拜遂立覃為皇太子

永興元年九月黜太子覃復為清河王三月河間王顥表請立成都王穎為太弟詔曰朕以涼德纂承洪緒于茲十有五年禍亂滔天姦逆仍起至乃幽廢重宮宗廟圯絕成都王穎溫仁惠和尅平暴亂其以穎為皇太弟都督外中諸軍事丞相如故時穎既入京師復旋鎮于鄴封二十郡拜丞相河間王顥表穎宜儲副遂廢太弟覃立穎為皇太弟丞相如故

十二月詔曰天禍晉邦冢嗣莫繼成都王穎自在儲貳政績虧損四海失望不可承重其以王還第豫章王熾先帝愛子令聞日新四海注意今以為皇太弟

即懷帝也

以隆

我晉邦時熾以清河王覃本太子也懼不敢當典書令盧陵修肅曰二相經營王室志寧社稷儲貳之重宜歸時望親賢之舉非大王而誰清河幼弱未允衆心是以既升東宮復贊藩國今乘輿播越二宮久曠常恐氏羗飲馬於涇川螳衆控弦於霸水宜及吉辰時登儲副上

翼大駕早寧東京下允黔首喁喁之望熾曰卿吾之宋
昌也乃從之

懷帝永嘉元年三月庚午立豫章王詮為皇太子

六年帝蒙塵于平陽前雍州刺史賈疋與京兆太守梁

綜共奉秦王鄴為皇太子於長安

即愍帝也

元帝建武元年三月辛卯即王位于建康丙辰立世子

紹為晉王太子

太興元年三月丙辰即皇帝位庚午立王太子紹為皇

太子

即明帝也

初帝為晉王有司奏立太子帝以瑯琊王褒

有成人之量過於紹從容謂司空王導曰立子以德不以年導曰世子宣城俱有昭儁之目固當以年於是太子位遂定

明帝大寧三年三月戊辰立皇子衍為皇太子

即成帝也

康帝建元二年九月丙申立皇子聃為皇太子

即穆帝也

戊

戌太子即皇帝位

簡文帝咸安二年七月乙未立會稽王昌明為皇太子

即孝武帝也
諱曜字昌明

孝武帝太原十二年八月立皇子德宗為太子

即安帝也

宋高祖初封宋王以子義符為王太子永初元年六月即

皇帝位為皇太子

即文
帝也

文帝元嘉六年三月丁巳立皇子劬為皇太子

臣欽若
等曰即

元凶
也

孝武帝孝建元年正月丙寅立皇子業為皇太子

即前
廢帝

也
未之東宮中庶子二率並入直永福省大明二年出

居東宮七年加元服

明帝泰始二年立皇子昱為皇太子

即後廢帝也

南齊太祖初封齊公時以子贍為齊國世子建元元年

四月太祖即位六月立贍為皇太子

即武帝也

武帝以建元四年三月即位六月甲申立皇子長懋為

皇太子

即文惠太子也

永明十二年正月皇太子長懋薨四月以長懋長子昭

業為皇太孫

即鬱林王也

詔東宮文武臣僚可悉改為皇太

孫官屬

東昏侯永元元年四月己巳立子誦為皇太子

梁高祖天監元年既受齊禪有司奏立儲副帝以天下始定百度多闕未之許也羣臣固請十一月甲子立長子統為皇太子

即昭明太子也

時太子年幼依舊於內拜東宮

官屬文武皆入直永福省五年五月皇太子始出居東宮

十四年正月乙巳朔皇太子冠

中大通三年四月乙巳昭明太子薨

五月丙申以晉安王綱為皇太子

即簡文帝也

七月乙亥臨軒策拜以修繕東宮權居東府四年九月
皇太子移還東宮

簡文帝太清三年五月辛巳即皇帝位立太子器為皇

太子

即哀太子也

元帝初封湘東王承聖元年十一月即位立王太子方

矩為皇太子改名元良

即愍懷太子也

後梁宣帝登立子歸為皇太子

即明帝也

明帝即位立子琮為皇太子

臣欽若等曰案後周蕭登傳無年月

陳文帝永定三年六月即位九月立皇子伯宗為皇太

子

即廢帝也

自梁室亂離東宮焚燼太子居于永福省天嘉

六年正月甲午皇太子加元服

廢帝光大元年七月戊申立皇子至澤為皇太子

宣帝太建元年正月即位立皇子叔寶為皇太子

即後主也

二月辛未太子謁太廟

後主太建十四年正月即位四月立皇子永康公裔為
皇太子

至德二年七月甲午太子加元服

禎明二年六月皇太子廢為吳興王立始安王深為皇
太子

魏太武延和元年正月丙午立皇子晃為皇太子

即景穆太子也

文成太安二年二月丁巳立皇子弘為皇太子

即獻帝也

獻文皇興三年六月辛未立皇子宏為皇太子

孝文帝也

文帝太和十七年六月立皇子恂為皇太子及冠恂於
廟帝臨光極東堂引恂入見誠以冠義曰夫冠禮表之
百代所以正容體齊顏色順辭令容體正顏色齊辭令
順故能正君臣親父子和長幼然母見必拜兄弟必敬
責以成人之禮字汝元道所寄不輕汝當尋名求義以
順吾旨

二十年十二月丙寅廢皇太子恂為庶人

二十一年正月丙申立皇太子恪為皇太子

即宣武帝也

西魏文帝立子欽為皇太子

即廢帝也

東魏孝靜帝武定七年八月立皇子長仁為皇太子

北齊文宣帝天保元年六月丁亥立子殷為皇太子

即廢帝也

孝昭帝初封常山王以子百年為世子皇建元年八月

即帝位十二月辛亥立為皇太子

即後主也

武成帝河清元年正月丙戌以皇子緯為皇太子

即後主也

後主武平元年六月皇子常生九月立為皇太子

後周太祖既受魏封為安定公恭帝三年以畧陽公覺

為安定公世子

即孝昭也

初太祖嫡嗣未建明帝居長已而

有成德孝閔處嫡年尚幼沖乃召羣公謂之曰孤欲立

子以嫡恐大司馬有疑大司馬即獨孤信明帝敬后父

也衆皆默然未有言者左僕射李遠曰夫立子以嫡不

以長禮經明義畧陽公為世子公何所疑若以信為嫌

請即斬信便拔刀而起太祖亦起曰何事至此信又自

陳說遠乃止於是羣公並從遠議出外拜謝信曰臨大

事不得不爾信亦謝遠曰今日賴公決此大議

高祖武帝建德元年四月魯國公立賁為皇太子

即宣帝也

帝親告廟冠於阼階

宣帝大象元年正月戊午行幸洛陽立魯王衍為皇太

子

即靜帝也

隋高祖初封隋王以子勇為王太子開皇元年即位立為皇太子

二十年十月乙丑太子勇廢為庶人十一月戊子以晉

王廣為太子

即煬帝也

是月當受冊高祖曰吾以大興功成

帝業令太子出舍大興縣

煬帝大業元年正月丙申立晉王昭為皇太子

即元德太子也

昭煬帝長子也仁壽三年以晉王領雍州牧煬帝即位便幸洛陽宮昭留守京師遣使者立為皇太子

冊府元龜卷二百五十六

欽定四庫全書

冊府元龜卷二百五十七 宋 王欽若等 撰

儲宮部

建立第二

唐高祖既受隋封為唐王義寧元年十一月恭帝以隴
西公建成為唐國世子武德元年五月高祖即位六月
庚辰立世子建成為皇太子

即隱太子也

九年六月癸亥詔曰儲貳之重式固宗祧一有元良以

貞萬國天策上將大尉尚書令陝東道大行臺尚書益
州道行臺尚書令雍蒲二州都督領十二衛大將軍中
書令上柱國秦王世民器質冲遠風猷昭茂宏圖夙著
美業日隆孝惟德本周於百行仁為重任以安萬物王
迹初基經營締構戡翦多難征討不庭嘉謀特舉長筭
必尅敷政大邦宣風區隩功高四履道冠二南任總機
衡庶績惟允職兼內外彝章載穆遐邇屬意朝野具瞻
宜乘鼎業允膺守器可立為皇太子

即太宗也

太宗以武德九年八月甲子即位十月癸亥尚書八座
奏請立儲貳詔曰尚書奏議以為少陽作二元良治本
虔奉宗祏式固邦家中山王承乾地居嫡長天姿峻嶷
仁孝純深業履昭茂早聞獻哲幼觀詩禮允茲守器養
德春宮朕欽承景業嗣膺保位憲則前王思隆正緒宜
依衆請以答僉望可立承乾為皇太子貞觀八年二月
己巳皇太子承乾加元服

十七年四月乙酉廢太子承乾為庶人丙戌詔曰昔者

哲王受圖上聖垂範建儲兩以奉宗廟總監撫以寧國
家既義出於至公亦事兼於權道故以賢而立則王季
興周以貴而升則明帝定漢詳諸方冊豈不然乎并州
都督右武侯大將軍晉王治地居茂親才惟明德至性
仁孝淑質惠和夙著夢日之祥早流樂善之譽好禮無
倦強學不怠今承華虛位率土繫心疇咨文武咸所推
戴古人云知子莫若父知臣莫若君朕謂此子寔允衆
望可以則天作貳可以守器承祧永固百世以寧萬國

可立治為皇太子所司備禮冊命

即高宗也

甲午臨軒授皇

太子冊已亥御兩儀殿皇太子侍側陳孝德以戒之謂侍臣曰朕御天下十有七載遂得太子一詣寢門知子唯父久已體之然初立以長不能廢棄今者喪敗其自取之矣初承乾之將廢也魏王泰日入奉侍太宗面許立為太子因謂侍臣曰泰昨入見自投我懷中云臣今日始得與陛下為子更生之日也臣有一孽子臣百年之後當為陛下殺之傳國晉王父子之道故當天性我

見其如此甚憐之褚遂良進曰陛下大失言伏願審思無令
錯誤也安有陛下百年之後魏王持國執柄為天下之
主而能殺其愛子傳國於晉王者乎陛下日者立承乾
為太子而復寵愛魏王禮數有踰於承乾者良由嫡庶
不分所以至此殷監不遠足為龜鏡陛下今日既立魏
王泰伏願陛下別安置晉王始得安全耳太宗涕泗交
下曰我不能因起入內太宗以晉王仁孝心所鍾愛又
以太原瑞石文云李治萬吉意以為嗣而未發言泰任

數知太宗愛晉王因謂之曰汝善於元昌今敗得無有
憂色晉王憂之見於顏色太宗怪而屢問方言其故太
宗慨然有悔立泰之言矣是日太宗御兩儀殿羣官盡
出詔留司徒長孫無忌司空房玄齡兵部尚書李勣諫
議大夫褚遂良謂曰我三子一弟所為如此我心無聊
因自投於牀引佩刀無忌等爭趨抱持太宗手中爭取
佩刀以授晉王無忌等請太宗所欲曰我欲立晉王無
忌曰謹奉詔有異議者臣請斬之太宗謂晉王曰汝舅

許汝也宜拜謝晉王因下拜太宗謂無忌等既符我意
未知物論何如無忌等又曰晉王仁孝天下屬心久矣
伏乞召問百僚必無異辭若不手舞同音臣負陛下萬
死妃嬪列於紗幃內傾耳者數百人聞帝與無忌等立
晉王議定一時噤叫響振宮掖太宗於是御太極殿召
文武六品以上曰承乾悖逆泰亦敗類朕所觀之皆不
可立欲選諸子尤仁孝者立為冢嗣爾其為朕明言衆
咸言晉王忠孝仁愛文德皇后之子立為儲君無所與

讓皆騰躍歡叫不可禁止太宗見衆情所與顏色甚悅
是日泰從百餘騎至永安門詔門司盡辟其騎令引泰
於肅章門入出玄武門幽於北苑

高宗永徽三年七月丁巳立陳王忠為皇太子忠高宗
長子永徽元年拜雍州牧時王皇后無子其舅中書令
柳奭說后謀立忠為太子以忠母賤冀其親已后然之
奭與尚書右僕射褚遂良侍中韓瑗諷太尉長孫無忌
左僕射于志寧等固請立忠為儲后高宗許之

顯慶元年正月辛未立代王弘為皇太子先是永徽六年十一月丁卯禮部尚書許敬宗奏曰臣聞元儲以貴立嫡之義尤彰罔敢同名正本之文逾顯所以內崇宗廟外重郊社取鑒前王行之自久陛下憲章千古含育萬邦爰立聖慈母儀天下繼而皇后生子合處少陽出自塗山是謂吾君之嗣夙聞胎教宜展問豎之心乃復獲宗降居藩邸從然養德猶韜甲館之符未纂承華尚阻商山之道是使前星匿彩瑤岳韜峯臣愚誠竊所未

喻且今之守器素非皇嫡永徽爰始國本未生權引基
星越外明兩近者元妃載誕正嗣降神重光有融燭暉
宜息安可以茲傍統叨據溫文國有諍臣孰逃其責謹
按春秋左氏傳云隱公元年春不書即位攝也昔宋武
公生仲子有文在其手曰為魯夫人故仲子歸于我生
桓公是以隱公立而奉之自營菟裘遜而歸老孔子褒
其讓嫡旌于此事之書又東觀漢史云光武皇帝子疆
居長建武之初為皇太子及皇后陰氏有子曰莊繇是疆

不自寧固求遜位帝乃從之封疆為東海王竟以莊為
太子是為孝明皇帝竊惟息姑克讓可以思齊劉疆守
藩宜遵往軌追蹤太伯不亦休哉踵武延陵故常安矣
寧可反植枝幹久易位於天庭倒襲裳衣使違方於震
位蠢爾黎庶云誰係心垂裕後昆將何播美又且父子
之際人所難言事或批鱗必嬰嚴憲臣竊為身計苟且
隨流尸祿偷榮固知無咎伏自思忖荷盼先朝引於陋
巷之中申以後車之禮雲臺畫象十有八人三紀于茲

唯臣僅在趨事陛下綿歷二坊叨處調護之流濫齒正
人之伍蔭璇華於望苑雕朽木以為容推鑿穀於天衢
偶雞樹而徒老常思自勉少報洪恩既屬天步康寧效
湛族而無所太階平晏須焚宗而靡由今茲冢嗣執珪
下枝當璧孟侯淪屈大典未申臣既分職文昌典司嘉
禮位均宗伯弗敢曠官效命之秋宜在茲日所以思不
出位輕叫帝閣冒嚴威干斧鉞忘忌諱竭精誠天或弗
違從其至理朝聞夕殞抃若登僊如塞謹言謹其芻蕘

煎膏染帛亦所甘心仍望奉見指陳藝典及召見帝曰卿朕之伯夷也立嫡之義在禮何如對曰正基本則萬事理皇太子國之本也本獨未正萬國無所係心據禮最為不可且在東宮者所出本微今知國家已有正屬必不自安竊位而懷自疑恐非宗廟之福願陛下熟計之帝曰忠已自讓對曰能為太伯願速從之

四年十月丙午皇太子弘加元服

後堯謚字敬皇帝

上元二年六月戊寅立雍州牧右衛大將軍雍王賢為

皇太子

即章懷太子也

調露二年八月己丑立左衛大將軍雍州牧共王哲為

皇太子

改名顯即中宗也

永淳元年二月戊午立皇孫重照為皇太孫重照中宗

長子開耀二年生於東內殿高宗甚悅及滿月立為皇

太孫

後避則天諱改名重潤降封邵王

中宗嗣聖元年二月壬子以永平王成器為皇太子

後改

名憲降封寧王

諡曰讓皇帝

神龍二年七月戊申立左衛大將軍衛王重俊為皇太

子時以除遂不行冊禮

即節愍太子也

睿宗唐隆元年六月丁未以平王隆基有安社稷之功

立為皇太子

即玄宗也

制曰舜去四凶而功格天地武有七

德而戡定黎民故知有大勲者受神明之福仗高義者

為七鬯之主朕恭臨寶位亭育寰區以萬物之心為心以

兆人之命為命雖承繼之道咸以冢嫡居尊而無私之懷

必推功業為首然後可保安社稷永奉宗祧第三子平

王隆基孝而克忠義而能勇比以朕居藩邸虔守國彝
貴戚中人都無引接羣邪害正凶黨實繁利口巧言讒
說罔極韋溫延秀朋徒競起晉卿楚客交構其間潛結
回邪排擠端善正人集木君子貼危愒日視陰朝不
保夕擁羽林萬騎率左右屯營先害朕躬并及太平公
主中外良士咸擬勦屠隆基密聞其期先難奮發挺身
鞠旅衆應如歸呼喻之間兇渠殄滅安七廟於幾墜濟
羣生於將殞方舜之功過四比武之德逾七靈祇毓德昆

弟樂推一人元良萬邦已定為副君者非此而誰可立
為皇太子有司擇日備儀注册命初睿宗即位議立皇
太子以宋王成器長而平王有誅韋氏之功意久不定
成器辭曰儲副者天下之公器時平則先嫡長國難則
歸有功若乖其宜則海內失望非社稷之計臣敢以死
請而平王聞之累日涕泣固讓言甚切至諸王等咸以
平王有社稷大功神祇僉屬羣臣又曰除天下之禍者
享天下之福拯天下之危者受天下之安平王有聖德

定天下宜膺主鬯以副羣心睿宗乃從之平王又抗表讓曰臣聞立嫡以長古之制也豈以臣有薄効虧失彝章伏願稽古而行臣之願也睿宗不許王又累表懇辭睿宗固拒之

玄宗開元二年十二月辛未立郢王嗣謙為皇太子制曰樹之后王所以輯寧黎獻前立儲副所以安固宗祧故能崇四術之科為萬國之本長幼君臣之序齒胄知歸溫文恭敬之風羣生攸屬古之制也其在茲乎郢王

嗣謙聰睿風成端莊特秀三雍禮樂必也生知五官詞藻居然暗合體道為器非假於學問資靈授德自符於神解夏弦春誦地義天經立人之道既彰為子之誠皆著今昇平在運域中咸寧將有事於元良固不踰於三善宜光近日之敏俾則前星之耀來年正月四日講禮冊為皇太子所司准式

七年十一月皇太子將加元服下制曰元良所以主匕鬯奉社稷貞于萬國祝以三加皇太子居長德之地務

親仁之道爰就師保克修志業寢門問安而資敬大學
齒胄而徵善大猷且酌元服宜申史稱周頌之年傳紀
魯襄之禮粵若敬始謂之成人逮茲建正式展嘉事可
以來年正月加元服所司擇日奏聞禮官博士詳考故
實允符令典

八年正月甲子皇太子加元服乙丑皇太子謁太廟十
三年制皇太子嗣謙改名鴻

二十六年以
罪廢為庶人

二十六年六月庚子制曰大寶曰位實在其丕承萬邦

以貞必建於明兩朕嗣守鴻業祇嚴永圖恭惟七鬯之
主豈捨人神之望開府儀同三司兼單于大都護河北
河東行軍元帥朔方軍節度使兼關內支度營田鹽池
押諸藩部落等大使上柱國忠王璵天假聰明生知仁
孝君親一致友悌二成溫文之德合於古訓敬愛之風
聞於天下嘗以視其所以察其所安考言有章詢事皆
中知子者父允叶於元良以長則順且符於舊典宜膺
擇嗣之舉俾受升儲之命可立為皇太子

即肅
宗也

仍取來

月內擇日冊命所司准式

七月己巳帝御宣政殿會九品以上文武百官冊皇太子忠王璿帝第三子自皇太子謹得罪廢為庶人王長而最賢遂立為皇太子

肅宗乾元元年五月庚寅詔成王俶宜立為皇太子改

名豫

即代宗也

所司擇日行冊禮

七月壬午皇太子於宣政殿謝冊命

十月甲辰帝御宣政殿冊皇太子

代宗廣德二年正月己卯立元帥尚書令雍王适為皇太子甲子雍王表曰臣性本凡愚識無久遠夙承訓誨未達禮經俾踐元良是輕主鬯顧惟孱懦何以克堪然臣頃總戎麾恭憑睿畧在臣何力妄欲貪天且五帝三王立嗣殊制王者家天下以傳子帝者官天下以傳賢胡有居五帝之時行三王之禮臣雖不敏竊謂非宜乃知古之正統不以年樹俊不以嫡明矣若以臣居嫡而廢德在長而捨賢恐大道淳風隱而不見伏以天下之

公器不可虛涉宗廟之宏綱不可輕舉伏惟陛下敦三善之本審萬國之貞不可以私授為心但可以推賢為慮則陛下享唐虞之德臣蒙伯邑之名乞回聖慈俯寢恩命帝詔答曰立嫡以長繼統惟賢三代成規百王令典惟爾元子敬而溫文孝叶天經學深義府克奉趨庭之訓遂成麟趾之才項總元戎式平巨猾外蕃受律羣帥叶謀咸推兔死之賢允負龍樓之拜宜膺德舉勿用勞謙乙丑又上表陳謙答詔不允即宜斷表

二月己巳帝御宣政殿冊皇太子先是寶應二年五月
宰臣及文武百僚上表請立皇太子兩表不從宰臣等
又上言曰伏見儲貳未立明兩虛位累有陳請愚誠不
從陛下以郊壘多虞羗戎侵軼即茲大典姑務安邊誠
聖主憂勤謙讓之心非國家固本久遠之計易曰重明
以麗乎正乃化成天下書曰一人元良萬邦以貞謹案
歷代哲王守邦建國未有不先定冢嗣以叶羣情然後
修禮文緝刑政於是諸侯以秩進戎狄以義敘七鬯以

時主監撫以事明宗祀之本不可斲闕今大盜初滅先零猖狂時號艱虞人懷底定而守嫡不建繼體未孚天下顒顒實有所望陛下固辭未免億兆搖心伏願遠圖百代之謀俯遂羣臣之請必冀四夷向化萬國歸誠帝手詔答曰卿等謨明廟堂夾輔王室請正長嫡以崇儲副稱元良之貞固天下之本比調主鬯誠哉是言但以黎庶不康甲兵久頓憂勞旰昃姑務息人與衆共守斯為急務冊命之禮輟而未行方俟有年用申盛典高秋

玄月平秩不遙因其萬物之成繼以重離之照子孫逢吉是謂大同待至此時依卿所請宜悉朕懷至是乃降冊命德宗以大歷十四年正月即位十二月乙卯詔曰主器者莫若長子繼明者必建儲兩既以傳重亦以崇本則君親之大義帝王之弘範無先於此矣朕以眇身繼承丕緒夕惕祇畏惟懷永圖承八葉之耿光居四海而稱大則七鬯之主棗盛之重樹元貴嫡有邦之先宣王誦生知古制既賢且長聰明敏博溫恭孝友不自滿

假率由憲章慶發高禔兆申甲觀為子之道惟父能知
審其觀志宜承大統固能總戎監撫載乎鼎寶不絕馳
道謙敬益崇問安必自於因心入學固知其讓齒升茲
上嗣庶貞萬國可立為皇太子

即順宗也

宜令所司擇日備

禮冊命建中元年正月冊皇太子

順宗以貞元二十一年正月即位三月癸巳詔曰萬國
之本屬在元良主器之重歸于長子所以固社稷正邦
統古之制也廣陵郡王淳孝友莊敬慈仁忠恕博厚以

容物見明而愛人祇服訓詞文皆合雅講求典禮學必承師言有令聞動無違德朕獲纘丕緒祇若大猷惟懷永圖用建儲貳以承宗廟以奉棗盛爰舉舊章俾膺茂典宜冊為皇太子改名純即憲宗也仍令有司擇日備冊命四月己丑帝御宣政殿冊皇太子時帝即位已久而臣下未有親奏對者內外咸言王侄王叔文專行斷決日有異說又屬頻陰雨皆以為羣小用事之應及將行冊禮之夕雨乃止至行事之時天景晴朗有慶雲見識者

以為天意有所歸及覩皇太子儀表班行悚動退無不相慶至有感而泣者其日道路觀悅遞相傳告中外有屬焉

憲宗元和四年閏三月丁卯詔曰朕聞君天下者繼承統業何常不樹建儲貳固安邦家況長子有主器之義元良貞立國之道上以嚴宗社之慶下以順長久之宜歷考前載率由斯道鄧王寧性與忠敬生知孝友秉寬明之度體慈愛之心學師訓謨詞尚經雅動皆中禮慮

不違仁稽以舊章允膺上嗣朕獲纘丕緒夙夜虔恭常
懼神明未敢政理多闕曠茲茂典亟涉歲時今屬方隅
甫寧品物咸遂覽皇王之制詢卿士之謀時瞻大猷莫
此為重是用授之七鬯位以青宮欽惟永圖俾服休命
宜冊為皇太子

即惠昭太子也

仍令有司擇日備禮冊命四月

令皇太子居少陽院其年有司將行冊禮以孟夏孟秋

再卜日臨事皆以雨罷至十月方就廷冊

六年太子薨

七年七月乙亥制曰承廟祧之尊固邦國之本重其緒

業貞以元良斯今古之通制也乃者春宮曠位已涉歲
時將恐裨獻闕主鬯之儀膠庠虛齒學之道其何以懷
寧方夏章示教源稽諸往冊用舉彝典遂有孝敬忠肅
寬明惠和遵保傳之言佩經訓之旨友于兄弟睦于宗
親博愛而恕己以誠慎行而飾躬以禮載觀所履克茂
厥猷宜升儲闡以對休命朕祗若成憲惟懷永圖法二
王垂統之秩紹十聖重光之烈致嚴禋配俾奉粢盛式
昭上嗣之宗庶協明離之吉宜冊為皇太子改名常

即穆

宗也仍令有司擇日備禮冊命十月壬寅帝即宣政殿冊

皇太子百寮退謁皇太子于崇明門幕殿凡三再拜太子皆答拜宮寮拜則受之又赴興慶宮進名奉賀皇太后穆宗長慶二年十二月癸巳制曰朕聞王者敬承宗祧欽若天命必建元子用寧邦家所以光協繼明嚴當主鬯朕繼承聖緒寅奉丕圖永惟國本之安爰在皇儲之重而青宮久闕望苑未開何以表式元良昭宣鴻業稽於往冊用舉彝章長男景王湛孝愛恭和忠敬誠肅慈

惠特稟寬仁夙彰言通典謨動協儀矩睦友宗屬遵承
傳道克修令問日茂嘉猷宜踐儲闈以承休命朕以君
尊父嚴每推乾道聞詩學禮用首人倫嘉翼翼於誠心覩
烝烝於孝敬克稱知子無讓前修俾奉棗盛式昭元嗣
宜冊為皇太子即敬宗也仍令有司擇日備禮冊命乙未宰
臣百寮並賀皇太后于興慶宮丙午帝御紫宸殿冊皇
太子故事冊太子御宣政前殿時以帝體未康慮勞登
御故從便也是日備宮懸於紫宸殿廷列而內仗於兩

閣門內羣臣辨色序立於宣政門外俄就外廊食訖始具冠服劍履入日月華門列位於正衙辰後一刻方入閣帝臨軒後以中官列侍太子步自崇明門以宮寮翼從駙馬二人扶整衣冠禮儀使導以進及樂作扇開羣臣拜訖太子進至龍墀東西再拜受冊攝中書令杜元穎跪讀冊文以授太子再拜蹈舞乃出歸于崇明門幕殿羣臣賀皇帝訖退詣崇明謁皇太子太子命舉簾執笏答拜宮寮拜則受之禮畢羣臣赴興慶宮稱賀初穆

宗因擊毬暴得風恙機務稍壅外庭不知宮中安否者三日京師人情恟然右僕射裴度三上疏請立儲嗣兩省官及翰林學士亦繼陳封章門下侍郎平章事李逢吉與同列因樞密中使梁守謙劉弘規王守澄同議遂迎置景王於少陽院然後固請穆宗御紫宸殿以安衆心乃以十二月五日入閣率百寮稱賀因請立皇子景王為儲后感激嗚咽聞者莫不涕零班退又獨進曰景王先聖皇太后嫡長子至正且順事無可疑伏望即賜

宣下臣謹便令有司擇日冊命時穆宗不能言微有許諾之意進吉還中書草奏封進時同列杜元穎先赴太廟宿齋進吉後出光範門以所進言請立太子不言請立景王遽廻馬追之獨改奏狀以進翌日詔下遂以景王為皇太子

文宗太和六年十月甲子詔曰禮重承祧義存繼體思崇守器必務建儲王者所以固大本而貞萬國也魯王永溫仁寬明聰敏孝愛動合至性居無放心樂善承顏

曠度容衆恭勤詩書之教率由忠愿之風懿茲徽猷光
我上嗣朕纂奉寶位丕寧聖圖欽若舊章同建儲貳爰
俾主鬯以率問安統正龍樓之榮昭宣甲觀之兆宜膺
茂典允屬元良宜冊為皇太子仍令所司擇日備禮冊
命太子帝長子也母曰王昭儀帝自即位承敬宗盤游
荒怠之後恭儉惕慎以安天下以晉王謹愿且欲建為
儲貳未幾晉王薨帝哀悼甚不復言東宮事久之方有
是命中外慶悅

七年八月庚寅御宣政殿冊皇太子禮畢百寮詣興慶宮賀太皇太后義安太后又詣光順門賀皇太后

開成三年

十月太子薨

開成四年十月制曰古先哲王之有天下也何嘗不正國本而成天序建儲兩而主重器朕以寡昧祇荷丕圖虔恭寅畏思固鴻業慎擇全懿曠于旬時而卿士獻謀龜筮告吉以為少陽虛位願舉盛儀列聖垂休俾合予志選賢而立式表無私敬宗皇帝第六男陳王成美天

假忠孝日新道德溫文合雅謙敬保和裕端明之體度
飭尚書之訓辭言皆中禮行不違仁是可以順考舊章
欽若成命授之七鬯以奉粢盛宜廻朱邸之榮俾踐青
宮之重可以為皇太子宜令所司擇日備禮冊命自青
宮虛位將相大臣百職言者拜章面陳凡累月帝遂冊
立陳王宋立與夷之志也

五年正月文宗暴疾兩軍中尉仇士良等矯詔立穎王為

皇太弟廢太

子為陳王

五年正月己卯制曰朕顧眇身獲承丕構嚴恭寅畏十

有五年雖宇內小康而大道猶鬱方思砥礪期臻治平而天不祐予夙嬰疾疹政既多闕心不自安近者凝沍所侵久而浸劇臣寮愛我內外一心禱祀畢為藥石備至亟換旬月有加無瘳懼不能躬總萬機日釐庶政稽于古訓謀及大臣用建親賢以貳神器親弟潁王炎朕昔在藩邸與同師訓動成儀矩深稟寬仁俾奉昌圖必諧人欲可立為皇太弟

即武宗也

應軍國政事便令勾當是

日兩軍自十六宅迎帝赴少陽院百官謁于東宮思賢

殿分命羣臣告天地社稷

武宗會昌六年三月遺詔立光王怡為皇太叔權勾當

軍國政事改名忱

即宣宗也

宣宗大中十三年八月遺詔立長子鄆王溫為皇太子

監國改名漼

即懿宗也

懿宗咸通十四年七月制立第五男晉王儼為皇太子

改名儼

即僖宗也

僖宗文德元年三月遺詔立壽王傑為皇太弟時帝暴疾

不豫羣臣以吉王最賢又在壽王之上將立之惟軍容

使楊復恭請立壽王

後改名即昭宗也

昭宗乾寧四年二月丙辰帝在華州節度使韓建表請

立太子己未制德王裕宜冊為皇太子

天祐元年八月為蔣玄暉所害

天祐元年八月遺詔曰輝王祚幼彰岐嶷長實端良哀

然不羣予所鍾愛必能克奉丕訓以安兆人宜立為皇

太子改名祝監軍國事

即哀帝也

冊府元龜卷二百五十七

欽定四庫全書

冊府元龜卷二百五十八 宋 王欽若等 撰

儲官部

誕慶 儀貌 令德 孝友 文學 失德

誕慶

夫王者當宇宙之大承基構之重期本枝之克茂故主器而斯尚載誕之始慶賜遂行或立裸祝之祠或赦囚繫之罪或以之賜爵級或因之錫宴喜所以上祇宗祏

下隆基緒者也垂諸竹帛不為過矣

漢戾太子武帝長子帝春秋二十九廼得皇子羣臣喜

枚臯與東方朔作皇太子生賦及立皇子禰祝

禮月令祀於高

禰高禰求子之神也武帝晚得太子喜而立此禰祠而令臯作祭祀之文也

受詔所為皆不

從故事重皇子也

宋太子劭文帝長子元嘉三年閏正月丙戌生二月乙

卯繫囚見徒一皆原赦時文帝猶在諒闇故秘之三年

閏正月方云劭生自前代以來有人君即位後皇后生

太子惟殷帝乙既踐祚正妃生紂至是又有劬焉體元居正帝甚喜悅

梁昭明太子統字德施高祖長子也母曰丁貴嬪初高祖未有男義師起太子以齊和帝中興元年九月生於襄陽與貴嬪留在州城京邑平乃還京師

哀太子大器字仁宗簡文帝嫡長子普通四年五月丁酉生

陳吳興王裔字承業後主長子也以宣帝大建五年二

月乙丑生於東宮母孫姬因產卒沈皇后哀而養之以為己子是時後主年長未有裔嗣宣帝因命以為嫡孫其日下詔曰皇孫載誕國祚方熙思與羣臣共同斯慶内外文武賜帛各有差為父後者賜爵一級

隋元德太子昭煬帝長子也初文帝以開皇三年四月庚午夢神自天下降云是天將生降寤召納言蘇威以告之及聞蕭妃在并州有娠迎置太興宮之客省明年正月戊辰生昭養於宮中

唐廢太子承乾太宗長子武德初文德皇后生於承乾殿因以名焉

太子忠字正奉高宗長子貞觀十七年十一月甲辰生高宗宴宮寮於弘教殿太宗幸東宮顧謂宮臣曰頃來生業稍可非無酒食而唐突卿等宴會者朕初有此孫故相就為樂太宗酒酣起舞以屬羣臣在位於是遍舞盡日而罷賜物有差

懿德太子重潤中宗長子高宗開耀二年中宗為皇太

子生於東宮內殿高宗甚悅及滿月大赦改元永淳是歲立為皇太孫

儀貌

夫肖天地之形體雲日之表受最靈之氣有繼明之象故天姿岐嶷出乎自然龍章粹和發於異稟是以居主鬯之重為天下之本有以見容止可度矣

宋太子劭文帝長子美鬚眉大眼方口長七尺四寸

南齊文惠太子長懋武帝長子也姿容豐美為高帝所愛

從容有風儀音辭和辯體素過壯在宮簡於遨遊

梁昭明太子統高祖長子也美姿貌善舉止體素壯腰

帶十圍

袁太子大器簡文帝嫡長子也性寬和神采端凝

陳太子深後主第四子也容止儼然雖左右近侍未嘗
見喜愠

唐章懷太子賢高宗第六子始出閣容止端雅深為高

宗所嗟賞

令德

夫嘉言善行必垂於後蓋以為人景慕與世作程矧未
登儲貳之尊應兩明之象而孝謹天至溫恭日新問安
侍膳具瞻三善之姿監國撫軍允副萬邦之望所以妙
選羽儀率尊師傅者顯於此矣

吳太子登大帝長子接待寮屬畧用布衣之禮或射獵
當繇徑道嘗遠避良田不踐苗稼至於頓息又擇空閑
之地其不欲煩民如此又失盛水金馬孟覺得其主左

右所為不忍致罰呼責數之長遣歸家勅親近勿言

太子和大帝第三子赤烏五年為太子都督劉寶白庶子丁晏晏亦白寶和謂晏曰文武在事當能幾人因隙構薄圖相危害豈有福哉遂兩釋之使之從厚

南齊文惠太子長懋自正位東儲善立名尚解聲律工射飲酒至數斗而未嘗舉盃從容有風儀音辭和辯引接朝士人人自以為得意與景陵王子良俱好釋氏立六侯館以養窮民

梁昭明太子統武帝長子孝謹天至寬和容衆喜愠不形於色年十二於內省見獄官將讞事問左右曰是皂衣何為者曰廷尉官屬召視其書曰是皆可念我得判否有司以統幼給之曰得其獄皆刑罪上統皆署杖五十有司抱具獄不知所為具言於高祖高祖笑而從之自是數使聽訟每有所寬縱者即使太子決之每入朝未五鼓便守城門開在東宮雖復燕居內殿一坐一起恒向西南面臺宿被名賞危坐達旦以時俗稍奢太子欲

以已率物服御朴素身衣浣衣膳不兼肉性仁恕見在
宮禁防捉荊子者問之云以清道驅人太子恐致傷痛
使捉手板代之頻食中得蠅蟲之屬密置枰邊恐厨人
獲罪不令人知又見後閣小兒攤戲後屬有獄牒攤者
法士人結流徒庶人徒太子曰私錢自戲不犯公物此科
太重令注刑止三歲士人免官獄牒應死者必降長徒
自此以下莫不減半又性愛山水於玄圃穿築更立亭
館與朝士名素著者遊其中嘗汎舟後池番禺侯軌盛稱

此中宜奏女樂太子不答詠左思招隱詩曰何必絲與竹山水有清音軌慙而止出宮二十餘年不畜聲樂少時勅賜太樂女伎一部畧非所好時高祖大弘佛教親自講說太子亦崇信三寶徧覽衆經乃於宮內別立慧義殿專為法集之所招引名僧談論不絕太子自立三諦法身義並有所通普通元年四月甘露降于慧義殿咸以為至德所感焉會大軍北討京師殺貴太子因命菲衣減膳改嘗饌為小食復敬耆老中舍人陸襄母年

將八十與蕭琛傳詔陸景每月嘗遣存問加賜珍羞衣服自加元服高祖使理萬機平斷法獄多所全宥天下皆稱仁每霖雨積雪遣腹心左右周行閭巷視貧困家及有流離道路密加賜與出主衣綿帛多作襦袴冬月以施貧凍若死亾無可以歛者為備棺槨每聞遠近百姓賦役勤苦輒歛容色嘗以戶口未實重於勞擾及薨朝野惋愕京師男女奔走宮門號泣滿路四方氓庶及疆徼之民聞喪皆慟哭

陳太子深後主第四子少聰慧有志操容止儼然左右
近侍未嘗見其喜愠

隋廢太子勇高祖長子性寬仁和厚率意任情無矯飾
之意

元德太子昭煬帝長子大業元年立為皇太子昭有武
力能引強弩性謙冲言色恂恂未嘗忿怒有深嫌可責
者但云大不是所膳不許多品帷席極儉素臣吏有老
父母者必親問其安否歲時皆有惠賜其仁愛如此

唐太子弘高宗第五子性仁孝深為帝及天后所鍾愛
咸亨初駕幸東都留太子於京師監國時大旱關中饑
乏令取廊下兵士糧視之見有榆皮蓬實者乃各給米
使足又請以同州沙苑地分借貸人詔許之顯慶三年
薨年二十四甚為士庶所痛惜高宗親為製輿德
紀并自書之于石

章懷太子賢高宗第六子始出閣容止端雅深為高宗
所嗟賞上元二年立為皇太子尋令監國處事明審為

時論所稱

孝友

古者並建師傅奉乎冢嫡所以琢磨懿範輔翼令猷夫父子之親存乎天性兄弟之愛謂之天倫人道之先何尚於此烝烝之志克奉於慈顏怡怡之懽溥敦於同氣則正家而定天下推已而刑四海粲盛有寄七鬯無失豈止問安之訓道映於龍樓致美之風事光於甲觀而已哉

吳太子登大帝之子也自武昌遷都建業時登鎮後以弟慮卒登往建業住十餘日欲遣西還深自陳乞以久離定省子道有關又陳陸遜忠勤無所顧憂帝遂留焉登所生庶賤徐夫人少有母養之恩後徐氏以妬廢處吳而步夫人最寵步氏有賜登不敢辭拜受而已徐氏使至所賜衣服必沐浴服之登將拜太子辭曰本立而道生欲立太子須先立后帝曰卿母安在對曰在吳帝默然及為皇太子時弟和有寵於帝登親敬待之如兄

嘗有欲讓之心

梁昭明太子性仁孝自出宮常思戀不樂高祖知之每五日一朝多便留永福省或五日三日乃還宮普通七年十一月母丁貴嬪有疾太子還永福省朝夕侍疾衣不解帶及薨步從喪還宮至殯水漿不入口每哭輒慟絕高祖遣中書舍人顧協宣旨曰毀不滅性聖人之制身不勝喪比於不孝有我在那得自毀如此可即強進飲粥太子奉勅乃進數合自是至葬日進麥粥一升高

祖又勅曰聞汝所進過少轉就羸瘵我比更無餘病正
為汝如此胸中亦填塞成疾故強加饘粥不使我常爾
懸心雖屢奉勅勸逼終喪日止一溢不嘗菜菜之味體
素壯腰帶十圍至是減削過半每入朝士庶見莫不泣
大通三年三月寢疾恐貽高祖憂勅看問輒自力手書
啓及稍篤左右欲啓聞猶不許曰云何令至尊知我如
此惡因便鳴咽四月乙巳薨時年三十一

哀太子大器簡文帝子性寬和兼神采端凝在於賊手

每不屈意初侯景西上攜太子同行及其敗歸部伍不復振肅太子所乘舡居後不及賊衆左右心腹並勸因此入北太子曰家國喪敗志不圖生主上蒙塵寧忍違離吾今亡匿乃是叛父非謂避賊便涕泗嗚咽令即前進賊以太子有器度每嘗憚之恐為後患故先及禍

隋元德太子昭煬帝長子也生而高祖養於宮中既長高祖嘗謂曰當為爾娶婦昭應聲而泣高祖問其故對曰漢王未婚時嘗在至尊所一朝娶婦則便出外懼將

違離是以啼耳高祖嘆其有至性特鍾愛焉

唐太子弘高宗子顯慶初義陽宣城二公主以母得罪幽于掖庭太子見之驚惻遽奏請令出降會帝幸東都留太子於京師監國駕發數日太子戀慕不已帝聞之遽追赴行在焉弘嘗受春秋左氏傳於率更令郭瑜至楚子商臣之事廢卷而嘆曰此事臣子所不忍聞經籍聖人垂訓何故書此瑜對曰孔子修春秋義存褒貶故善惡必書褒善以示法貶惡以誠後故使商臣之惡顯

于千載太子曰非惟口不可道固亦耳不忍聞請改讀
餘書瑜再拜賀曰里名勝母曾子不入邑號朝歌墨子
回車殿下誠孝實資膚情天發凶悖之迹點於視聽循
奉德音實深慶躍臣聞安上理人莫善於禮非禮無以
事天地之神非禮無以辯君臣之位故先王重焉孔子
曰不學禮無以立請停春秋而讀禮記太子從之

才智

禮云一有元良萬邦以貞蓋世子之謂也若乃才繇天

縱志本夙成解經若生知臨事必先覺無假師保之訓
自成聰哲之謀而明兩有暉承葉作則故可得而稱也
吳太子登嘗乘馬出有彈丸過左右求之有一人操彈
佩丸咸以為是辭對不服從者欲捶之登不聽使求過
丸比之非類乃見釋

孫和為太子時有司頗以條書問事和以為姦妄之人
將因事錯意以生禍心不可長也表宜絕之又嘗言當
世士人宜講修術學較習射御以周世務而但交游博

奕以妨事業非進取之謂後羣僚侍宴言及博奕以為
妨事費日而無益於用勞精損思而終無所成非所以
進德修業積累功緒者也且志士愛日惜力君子慕其
大者高山景行恥非其次夫以天地長久而人居其間
有白駒過隙之喻年齒一暮榮華不再凡所患者在於
人情所不能絕誠能絕無益之欲以奉德義之塗棄不
急之務以修功德之基其於名行豈不善哉夫人情猶
不能無嬉娛嬉娛之好亦在於飲宴琴書射御之間何

必博奕然後為歡乃命侍坐者八人各著論以矯之於是中庶子韋曜退而論奏和以示賓客時蔡邕好奕直事在署者頗數焉故以諷之

晉愍懷太子遹惠帝長子少聰慧武帝時宮中嘗失火武帝登樓望之太子時年五歲牽帝裾入閣中帝問其故太子曰暮夜倉卒宜備非常不宜令炤見人君也繇是竒之嘗從帝觀豕牢言於帝曰豕甚肥何不殺以享士而使久費五穀帝嘉其意即便烹之因撫其背謂廷

尉傳祇曰此兒當興我家嘗與羣臣稱太子似宣帝於是令譽流於天下惠帝即位立為皇太子

梁昭明太子統武帝長子天監元年始二歲立為皇太子三歲受孝經論語五歲徧讀五經悉能諷誦性寬和高祖數使聽訟每有欲寬縱者即使太子決之建康縣獄誣人誘口獄翻縣以太子仁愛故輕當杖四十令曰彼若得罪便合家孥戮今縱不以其罪罪之豈可輕罰而已可付治十年自加元服高祖便使省萬機內外百司奏

事者填塞於前太子明於庶事纖毫必曉每所奏有謬誤及巧妄皆即就辯析示其可否徐令改正未嘗彈糾一人

隋元德太子昭煬帝長子也生而高祖命養宮中三歲時於玄武門弄石獅子高祖與文獻皇后至其所高祖適患腰痛舉手憑后昭因避去如此者再三高祖嘆曰天生長者誰復教乎繇是大奇之

唐太子承乾太宗長子少敏惠太宗甚愛之貞觀八年

九月太子來朝太宗謂侍臣曰我以承乾多疾病不令讀書但與孔穎達評論古事我試令作數紙書言經國大體立成三紙頗有可觀先論刑獄為重深得經邦之要也

章懷太子賢高宗第六子處事明審為時論所稱初為潞王始出閣高宗嘗謂司空李勣曰此兒已讀得尚書禮記論語誦古詩賦復十餘篇整經領覽遂即不忘我曾遣讀論語至賢賢易色遂再三復誦我問何為如此

乃言性愛此言方知夙成聰敏出自天性

文學

夫儲貳之建所以重宗祧而承天序也故有師保之訓
書禮之教然後溫文著於內英華發於外所謂行一物
而三善皆得者其世子齒於學之謂也繇漢而下或通
經肄業成於講習或立言著論煥乎義趣或雕章麗藻
駿發於豪翰或遺文往行克就於編緝斯固彰郁郁之
美播洋洋之譽玉振而金相星暉而海潤者已

漢武帝戾太子據少壯詔受公羊春秋

少壯者言漸長大也

又從

瑕丘公受穀梁

南齊文惠太子長懋武帝長子也初太祖好左氏春秋太子承旨諷誦以為口實及豫章王嶷薨太子見帝友于既至造碑文奏之

梁高祖昭明太子統三歲受孝經論語五歲徧讀五經悉能諷誦天監八年於壽安殿講孝經盡通大義游宴祖道賦詩至十數韻或命作劇韻賦之皆屬思便成無

所點易嘗自討論篇籍或與文士商確古今間則繼以文章著述率以為常于時東宮有書三萬卷名才並集文章之盛晉宋以來未之有也所著文集二十卷又撰古今典故文言為正序十卷五言詩之善者為文章英華二十卷文選三十卷

愍懷太子方矩元帝子少勤學聰穎有元帝風

陳後主廢太子商性聰敏好學執經肄業終日不倦博通大義並善屬文

隋高祖廢太子勇頗好學解屬詞賦帝欲徙民北實邊

塞勇上書直諫帝覽而嘉之

書具儲宮諫諍門

唐高宗太子弘初入東宮請於崇賢館置學並置生徒
詔許之始置學生二十員東宮三師三少賓客詹事少
詹事左右庶子左右衛卒率及崇賢館三品學士子孫
亦宜通取弘嘗受春秋左氏傳於率更令郭瑜又讀禮
記龍朔元年命中書令兼太子賓客許敬宗侍中兼太
子右庶子許圜師中書侍郎上官儀太子中書舍人楊

思儉等於文思殿博探古今文集摘其英詞麗句以類相從勒成五百卷名曰瑤山玉彩表上之制賜物三萬段敬宗以下加級賜帛有差

章懷太子賢高宗第六子始出閣高宗謂司空李勣曰此兒已讀得尚書禮記論語誦古詩賦復十餘篇暫經領覽遂即不忘上元二年立為太子賢招集當時學者太子左庶子張太安洗馬劉訥言雒州司戶格希玄學士許叔牙成玄一史藏諸周寶寧等注范曄後漢書表

上之賜物三萬仍以其書付秘閣

太子瑛玄宗子開元二十五年玄宗命瑛題御史大夫
李適之所撰河隄記碑額又命永王璘書其碑陰時皇
太子與諸王新賦毬塲詩序適之乃上言曰臣不工文
且非碩學更紆天人之翰以光鄙野之文又見陛下訓
以義方教之親睦文王美棠棣之華皇王之際於斯為
盛事連中禁恐良史闕書請編諸典策以光千古帝手
詔報曰卿文勒石誠為可重故令兒子題額及陰何所

發揮而勞致謝毬塲宴樂咸沐深慈豈伊斐然少能申
寫卿為宗子欲名教有歸記之史冊亦隨卿意

失德

夫反德為亂棄德不詳故仲尼戒其不修臯陶勤其邁
種良有謂也矧復應前星之象當主鬯之重是為天下
之本用承萬代之業乃有居昏長教犯義踰矩崇侈汰
以自恣謀逸豫以無度雖天威有赫臨之而不悛近侍
盡規正之而罔顧以至貽厥敗累垂諸編簡噬臍之悔

庸可及乎

晉愍懷太子遹惠帝長子不好學惟與左右嬉戲不能
尊敬師傅賈后素忌之密勅黃門閹官媚諛於太子曰
殿下誠可及壯時極意所欲何為嘗自拘束於是慢弛
益彰或廢朝侍嘗在後園游戲愛埤車小馬令左右斷其
鞅勒使墮馬為樂或有犯忤者手自箠擊之性拘小忌
不許繕壁修牆正瓦動屋而於宮中為市使人屠酤手
揣斤兩輕重不差其母本屠家女也故太子好之又令

西園賣葵菜藍子鷄麪之屬而收其利東宮舊制月請錢五十萬備於衆用太子嘗採取二月以供嬖寵洗馬江統陳五事以諫之太子不納中書舍人杜錫以太子非賈后所生而后性克暴深以為憂每盡忠規勸太子修德進善遠於讒謗太子怒使人以針著錫常所坐氊中以刺之

南齊文惠太子長懋武帝長子風韻甚和而性頗奢麗宮內殿堂皆雕飾精綺過於上官開拓玄圃園與臺城

北塹等其中樓觀塔宇多聚奇石妙極山水慮上官望見乃傍門列修竹內施高鄣造游牆數百間施諸機巧宜須鄣蔽須更成立若應毀撤應手遷徙善製珍玩之物織孔雀毛為裘光以金翠過於雉頭矣以晉明帝為太子時立西池乃啓武帝引前例求東田起小苑帝許之永明中二宮兵力全實太子使宮中將吏更番役築宮城苑巷制度之盛觀者傾京師帝性雖嚴多布耳目太子所為無敢啓者後帝幸豫章王宅還過太子東田

見其彌亘華遠壯麗極目於是大怒收監作主師太子
懼皆藏匿之繇是見責太子素多疾體又過壯常在宮
內簡於遨遊玩弄羽儀多所僭擬咫尺及宮禁而帝終
不知太子嘗使徐文景造輦及乘輿御物武賁雲罕之
屬帝嘗幸東宮忽忽不暇藏輦文景乃以佛像內輦中
故帝不疑及太子薨嘗履行東宮見太子服玩過制大
怒勅有司隨事毀除以東田殿堂改為崇墟館

後魏廢太子恂孝文長子不好書學體貌肥大深忌河

雖暑熱意每追樂北方中庶子高道悅數苦言致諫恂甚銜之孝文幸嵩岳恂留守金墉謀欲召牧馬輕騎奔代手刃道悅於禁中領軍元儼勒門防遏夜得寧靜帝聞之駭惋外寢其事仍至汴口而還引恂數罪與咸陽王禧等親杖恂又令禧等更代百餘下

隋廢太子勇高祖長子嘗文飾蜀鎧帝見而不悅恐致奢侈之漸因而誡之其後經冬至百官朝勇張樂受賀帝知之間朝臣曰近聞至節内外百官相率朝東宮是


何禮也太嘗少卿辛亶對曰於東宮是賀不得言朝帝
曰改節稱賀止可三數十人隨情各去何因有司徵
召一時普集太子法服設樂以待之東宮如此殊乖禮
制於是下詔停斷自此恩寵始衰勇多內寵昭訓雲氏
尤稱嬖幸禮匹於嫡勇妃元氏無寵嘗遇心疾二日而
薨獻皇后意有佗故甚責望勇自是雲昭訓專擅內政
后彌不平頗遣人伺察求勇罪過

唐隱太子建成高宗長子外結小人內連嬖幸復與諸

公主及六宮親戚驕恣縱橫并兼田宅侵奪犬馬同惡相濟掩蔽聰明苟行已志唯以甘言諛辭承候顏色

太子承乾太宗長子好聲色慢遊無度然懼太宗知不敢見其迹每臨朝視事必言忠孝之道退朝後便與羣小褻狎有太常樂人年十餘歲美姿容善歌舞承乾特加寵幸號曰稱心太宗知而大怒收殺之承乾痛悼不已於宮中構室立其形像列偶人車馬於前令宮人朝暮奠祭承乾數至其所徘徊流涕仍於宮中起冢而

葬并贈官樹碑以申哀悼承乾自此托疾不朝叅者輒
過數月嘗命戶奴數十百人專習伎樂學胡人推髻剪
綵而舞衣尋橦跳劍晝夜不絕鼓角之聲日聞於外



冊府元龜卷二百五十八